

Mwer dxihtsi nin baca'h San Pahblu loh ra' bwiinn Tesalónica

GuelrgahpaDxiohs

1 Na'h Pahblu, cun Silvanu, cun Timoteu; raca'h nu dxihtsi rii' loh tu lasaa' ra' nu nin naa ra' bwiinn guido' xteenn guihtxyi Tesalónica nin nabahannee ra' tuhsi la'h Xtaada Dxiohs ra' nu cun neezaa Daada Jesucristu xteenn nu'h. La'h Ñi'h gacanee Ñi'h la'h tu cun gusacwachidxyii Ñi'h sto' tu.

Gwachiisto' ra' bwiinn Tesalónica xchi'dxyi Dxiohs

²Garaa dxyih radi'hi nu guelzuxchiilli la'h Dxiohs pur garaa tu cun riagannasto' nu la'h tu chin rbwihdxyi-rnaaba nu gacanee Dxiohs la'h ra' nu'h, ³nee raze'ta za nu loh Xtaada Dxiohs nu'h xa ruhnn tu dzi'n, laasii riachiisto' tu xchi'dxyi Ñi'h neezaa ziga ruhnn duxa tu dzi'n tin rahcane tu lasaa' tu nin ayi xi nahpatii' laasii ruca'sto' tu la'h Dxiohs, neezaa xa ruchihpato' tu naannloh tu guibia'garii Daada Jesucristu loh guidxyiyuh. ⁴Bwihtsi ra', Dxiohs nadzii'hi Ñi'h la'h tu nee la'hza Ñi'h gulii Ñi'h la'h tu, ⁵laasii chin balu'yi'hn xchi'dxyi Dxiohs loh tu,

ayi dxyi'dxyizi dxi'h guhcan sino que neezaa xquelrnabwa' Spíritu Saantu Dxiohs tin guhcabwa' tu cuun nin naa dxyi'dxyi guchii. Naann cha'yi za tu xa guhca nu chin guyuu' nu loh tu tin baluu'yi nu la'h tu xa guibahan nayaa tu.

⁶Ziga gahca nin bwa'ha tu gubahannee nu lahda tu, la'h tu zeezah nabahannee tu ziga baluu'yi Daada JesuCristu la'h tu, nee basiahxi Spíritu Saantu sto' tu gaduhbi nin guca'ha tu dxyi'dxyi chi nicala guzahcazii tu. ⁷Zi'chi guhca tin baluu'yi tu loh garaa ra' bwiinn nin riachiisto' ñi'h xchi'dxyi Dxiohs nin nuu ra' guihtxyi ra' nin rnabwa' Macedonia cun Acaya xa rga'ha guunn ra' ba, ⁸laasii pur la'h tu bidi'chi xchi'dxyi Dxiohs garaa nehza, ayi guihtxyi si dxi'h nin rnabwa' Macedonia cun Acaya, sino que gaduhbi guidxyiyuh bidi'chi dxyi'dxyi ziga riachiisto' tu xchi'dxyi Jesucristu, ya ni'chin nin ayiru rchi'hn chy guuyidxyi'dxyinee la'h bwiinn pur ziga riachiisto' tu xchi'dxyi Dxiohs, ⁹laasii snuhn ra' bwiinn chi ruu'yidxyi'dxyi ra' ba loh nu xa bidxuu nu loh tu nee gahca za

xa basaa'n tu guunn tu dxaan ra' tin biahca tu xpwiinn Dxiohs nin nuu nabahandzi'tsi llaa'ndxibaa'.
¹⁰Ruu'yidxyi'dxyi za ra' ba xa cabweeza tu gadzihn dxyih nin guibia'garii Jesucristu loh guidxyiyuh; cagaze'ta'hn Jesucristu nin babwe'he Dxiohs loh ra' bwiinn guuchi tin babahn Ñi'h, yannah Jesucristu naa Dxiohs nin guta'h la'hnu loh guelrza'cazii nin guti'dxi Dxiohs la'h ra' bwiinn guidxyiyuh.

**Dzi'n nin bwi'hnn Pahblu
 loh guihdxyi Tesalónica**

2 La'hgahca tu naann tu, bwihtsi ra', ayi bio'pa llaa'ha nu loh yu'bitu, ²nicala naann za tu galoh nin badzihn nu nez ca bachi'chi ra' bwiinn la'h nu nee basa'cazii ra' za ba la'h nu guihdxyi Filipos, per nicala bati'dxiloh nu guelrza'cazii per bani'hi Dxiohs guelnadxipasto' la'h nu ayi bidxyihbi nu baluu'yi nu xchi'dxyi Dxiohs loh tu nicala gyyuu' nin baca'nee la'h nu, ³laasii ayi baluu'yi nu dxyi'dxyi xihn ra', nee ayi za chyuu rñi' dxyi'dxyi dxaaba ra', nee ayiza naa ra'n dxyi'dxyi ra' nin rusagui'hi. ⁴Sino que Dxiohs basia'nnee xchi'dxyi Ñi'h la'h nu, laasii naann Ñi'h galuu'yi nu nin naa xnehza, nee zi'chi cagaluu'yi nu, ayi tin dxia'hanza'ca dxi'h nu loh ra' bwiinn, sino que loh Dxiohs nin nu'nbwa' lasto' ra' nu. ⁵La'tu naann xa baluu'yi nu xchi'dxyi Dxiohs; ayi biogaluu'yi nu xica dxyi'dxyi dxieerba tin ñaxahdzi nu la'h tu, nee ayiza baluu'yi nu xchi'dxyi Ñi'h tin ñica'ha nu xiilla xiteenn tu. Dxiohs naann

nayaatii' naa lasto' nu pur dee'.
⁶Nin tuhbi ayi chyuu cadxi'hyi nez guunn lasahca ra' bwiinn la'h nu, nin yu'bitu ayi chyuu ranaaba guunn lasahca tu la'h nu, nee nin stuhbi dxyi'dxyi ra' nicala ñahca ñidi'hnn nu ñahcabwa' tu nahpa nu guelnabwa' pur naa nuu pooxtla ra' xteenn Jesucristu, ⁷sino que la'la'ga'h bidxuunee nado'tii' nu la'h tu zigazi ruchioo' tuhbi gunna'h llii'n biu'yi'hn ba cun ziga rudi'hi ba duuda ree' bi. ⁸Pwihsi ni'chin ayi tansola dxi'h xchi'dxyi Dxiohs ñani'hi nu la'h tu sino que nicala nee xquel nabahan pa'ca nu ñani'hi nu, balaaca nin nadzii'hi nu la'h tu. ⁹Bwihtsi ra' nu, la'h tu riagannasto' tu xa bidi'hnn nu dzi'n tin bidi'hnn nu gahn xquelnabahan nu. Bidi'hnn nu dzi'n dxyih nague'la laasii tin ayi ñahcan tuhbi carga para la'h nin tuhbi tu gaduhbi nin cagaluu'yi nu xchi'dxyi Dxiohs nez loh tu.

¹⁰La'hgahca tu naann cha'yi tu, cun neezaa Dxiohs naann cha'yi Ñi'h xa bidxuunee nu la'h tu ziga bwiinn nayaa nez loh tu, bwiinn nin ruhnn xnehza bwiinn nin ayi chyuu gudzii'ba duhlda yihca ñi'h, ¹¹neezaa la'tu naann xa bachi'ñi'nee nu la'h tu cun basacwachidxyii nu lasto' tu tuhbigah tu ziga ruhnn tuhbi guzahn ndxi'hw loh ra' llii'n ba chin rñi'nee ba la'h ra' bi. ¹²Garaa dee' bidi'hnn nu tin guibahan nayaa tu ziga rga'ha guunn ra' nin naa ra' xpwiinn Dxiohs nin guidhxyi la'h tu tin chuu tu loh xquelnabwa' Ñi'h nee neezaa loh lla'ñih xteenn Ñi'h.

¹³Ni'chin nin radi'hi duxa nu guelzuxchilli la'h Dxiohs laasii

chin bihn tu xchi'dxyi Dxiohs nin baluu'yi nu la'h tu, gwachiisto' tun naan xchi'dxyi Dxiohs, ayi zigazidxi'h dxyi'dxyi ra' nin rdxinlaadzi ra' bwiinn guidxyiyuh, sino que naan xchi'dxyi Dxiohs laasii rusiaa'han lasto' ra' bwiinn nin riachiisto' ñi'h.

¹⁴Bwiitsi ra' ziga basahcazii ra' bwiinn lahdxyi tu la'h tu zi'chi za guzahcazii ra' xpwiinn Jesucristu la'n guido' nin nuu ra' guihdxyi Judea, pwihsi nee ra' za ba bire'guna'hla ra' bwiinn Israel la'h ra' ba. ¹⁵Bwiinn Israel ra' rii gudxiinn la'h Daada Jesucristu xteenn nu'h, nee ziga galoh gudxiinn ra' ba la'hgahca xprofeta ra' ba nin bie'gañi' xchi'dxyi Dxiohs loh ra' ba, ya ni'chin bire'guna'hla ra' ba la'h nu laasii ayi rantsii'hi ra' ba la'h Dxiohs, nee laasii ayi za gusaa'n ra' ba chechiisto' ra' bwiinn xchi'dxyi Jesucristu. ¹⁶Pwihsi chin xclaa'dzi nu gachidii'yidxyi'dxyi nu loh ra' bwiinn nin ayi naa ra' bwiinn Israel ziga neezaa la'h ra' ba ta'h ra' ba loh duhlada, pwihsi ayi rusaa'n bwiinn Israel ra' chi chyu guiñi' loh ra' snuhn ra' bwiinn chi, per la'h ra' ba sola cagatahla ra' ba xtuhlda ra' ba, per nnah la'h xquelguxchisi Dxiohs badzihn gahxu dxiaaba yihca ra' ba tin chilli ra' ba nin cayuhnn ra' ba.

**Xclaa'dzi Pahlbu guibia'garii
ba guihdxyi Tesalónica**

¹⁷Bwihtsi ra', nnah loh dxyih nin ayiru chyu rwa'ha loh lasaa', per nicala ayi chyu rwa'ha loh lasaa', seguihdu gahca riagannasto' nu la'h tu nee gaduhbi xigaaba

nu xclaa'dzi nu dxio'padia'ha nu cuun tu. ¹⁸Ziahan la xclaa'dzi nu ñio'pa nu, mas na'h Pahlbu ziahan la guclaa'dzihn ñe'ldahn per ayi basaa'n bwiinndaaba ñe'ldahn. ¹⁹Pwihsi, ¿chyu ni'ca naa xcweenta ñi'h nin rbweeza nu nee xcweenta nin riahxi nu, nee cun xcweenta nin rahca lasahca nu? La'hgahca tu naa ra' dee' chin gadzihn dxyih nin dxi' Daada Jesucristu stuhbi. ²⁰Sidela la'h tu naa tu nin raguu' nasaa lasto' nu nee cun nin rusiahxi la'h nu nez loh Dxiohs.

3 Ya ziga cun ayi ru guhlada guzuhñe'ldahn, ni'chin bidi'hnn nu lligaaba bidxia'han nu guihdxyi Atenas, ²ya baxe'hla nu Timoteu, bwihtsi lasaa' nu'h loh Jesucristu nin naa za tuhbi xpwiinn Dxiohs nin ruhnnee nu dzi'n loh xchi'dxyi Daada Jesucristu. Ni'chin nin baxe'hla nu la'h ba tin cwachidxyii ba lasto' tu nee guzuhchihpa za ba lasto' tu ziga riachiisto' ba xchi'dxyi Jesucristu, ³tin nin tuhbi tu ayi guiria'gahn tu loh guelrza'cazii ra' nin cagati'dxiloh tu ca, laasii ba naann tu garaa nu'h nahpa gati'dxiloh nu'h guelrzahcazii zi'ca. ⁴Nee chin dxunee gahca nu la'h tu bachiñi'xgah nu loh tu zati'dxiloh nu guelrza'cazii; ya bihn tu cuun nin gachiza'ca nu ziga nin ba bañi' nu nee zi'chi guhca. ⁵Ni'chin ayiru gunnahsto'n ñe'ldahn, ya ni'chin nin guixe'hla'hn tuhbi guelrnaabadxyi'dxyi xa zezahnee tu xchi'dxyi Dxiohs laasii cadxyiibihni ayi nagah basagui'hi bwiinndaaba la'h tu, ya ñaria'caa xtsi'n nu dzi'n lliaa'ha.

⁶Yannah nin gubia'garii Timoteu bie'ganee ba dxyi'dxyi xcweenta ziga riachii dzi'tsi sto' tu, nee cun ziga nadzii'hi lasaa' za tu, nee cun nnah za ba rzahcariin tu la'h nu; xclaa'dzi tu gwa'ha tu loh nu ziga za xclaa'dzi nu guidia'ha za nu loh tu. ⁷Ni'chin, bwiitsi ra', nicala ria'dxi xixteenn nu cun rati'dxiloh nu guelrza'cazii, riahxi nu laasii la'h tu zeezah loh ziga riachiisto' tu xchi'dxyi Jesucristu, ⁸yannah riahxi pa'ca nu cun riuu' gahn lasto' nu laasii rahcabwa' nu zuudzi'tsi tu ziga riachiisto' tu xchi'dxyi Jesucristu. ⁹Hasta ayi guidxeela nu dxyi'dxyi nin gadi'hi nu guelzuxchilli loh Dxiohs pur la'h tu nee pur nin basiahxi tu lasto' nu loh Ñi'h. ¹⁰Dxyih-nague'la rnaaba nu loh Dxiohs tin gacanee Ñi'h la'h nu tin dxio'padia'ha nu cuun tu tin galuu'yi nu la'h tu garaa dxyi'dxyi ra' nin caya'dxi tu loh xchi'dxyi Dxiohs nin riachiisto' tu.

¹¹Rnaaba nu loh Xtaada Dxiohs nu'h neezaa loh Daada Jesucristu xteenn nu'h tin gacanee Ñi'h dxio'padia'ha nu xa nuu tu, ¹²nee rnaaba za nu loh Daada Jesucristu xteenn nu'h tin gacanee Ñi'h gaantsii'hi lasaa' ru tu ziga tuhbi ziga stuhbi tu nee cun garaatii' bwiinn ra', ziga zi nadzii'hi nu la'h tu, ¹³tin pur gacanee Ñi'h la'h tu ayi chyu gusiahchyu lasto' tu sino que gaca si tu xpwiinn Ñi'h tin ayi tsiiba duhlda yihca tu loh Xtaada Dxiohs nu'h chin gadzihn dxyih dxi' nin gabia'garii Daada Jesucristu cun garaa ra' xpwiinn Ñi'h nin nuu llaa'ndxibaa'.

**Loh nin guibahan nu dxiahxinee
nu xchi'dxyi Dxiohs**

4 Yannah bwiitsi ra', basi'dxi nu la'h tu xa xclaa'dzi Dxiohs

guibahan tu, nee zi'chi cayuhnn tun, per nnah rachiñi'nee nu la'h tu tin chezahru guunn tun, nee squii' rachiñi' nu loh tu laasii ba naa nu'h xpwiinn Jesucristu. ²Garaa tu la'tu naann dxyi'dxyi ra' xteenn Daada Jesucristu xteenn nu'h, ziga baluu'yi nu la'h tu cun xquelnabwa' Ñi'h. ³Dxiohs xclaa'dzi Ñi'h guibahan nayaa tu ayi xclaa'dzi Ñi'h gaca tu bwiinn duhlda ayi guidxa'ga tu che'hla lasaa' tu, ⁴tin gacabwa' tubbigah tu xa guibahannee tu che'hla si tu tin guibahan nayaa tu nee gulgantsii'hi la'h bi laasii lasahca bi, ⁵ayi ziga ruhnn dxi'h bwiinn ra' nin ayi nu'nbwa' la'h Dxiohs, bwiinn ra' chi ruhnn ra' ba trahtu la'h che'hla ra' ba ziga tuhbi gunna'h loh nehza. ⁶Nin tuhbi tu ayi gusagui'hi tu bwiitsi tu loh ra' dee' laasii zusa'cazii Dxiohs la'h ra' nin guunn zi'chi; la'nu baluu'yi la cun la'h nu bachiñi'xgah loh tu xa guunnee Dxiohs la'h ra' nin ayi guzo'badxiahga xchi'dxyi Ñi'h. ⁷Dxiohs ayi gudihdxidxi'h Ñi'h la'h nu tin guibahan dxaaba nu loh Ñi'h, sino que tin guibahan nu loh guelnabahan nayaa xteenn Ñi'h, ⁸ya bwiinn nin ayi ruzo'badxiahga dxyi'dxyi rii', ayi guunn ba lligaaba rbwe'hesto' ba xchi'dxyi nu sino que xchi'dxyi yu'pi Dxiohs nin bani'hi Spíritu Saantu Ñi'h la'h tu. ⁹Ayi guichi'hn tu guca'h ruhnn dxyi'dxyi loh tu pur xa nahpa gantsii'hi lasaa' tu, bwiitsi ra', laasii la'h gahca Dxiohs baluu'yi la'h tu xa gantsii'hi lasaa' tu ziga tuhbi ziga stuhbi tu. ¹⁰Zi'chi ruhnn tu nadzii'hi tu garaa ra' bwiitsi ra' nu'h

nin nuu ra' gaduhbi nez Macedonia, ni'chin nin rnaaba nu loh tu bwihtsi ra', mahzi ru gantsii'hi lasaa' tu. ¹¹Gulwachidxyii sto' tu, ayi rii'-ri'chi cwihaa tu sino que gulchuu' loh xtsi'n tu tuhbigah tu, nee cun la'hgahca naa tu gulgui'hnn dzi'n ziga nin la'nu bachinabwa' nu guunn tu, ¹²tin gwa'ha ra' bwiinn nin ayi riachiisto' ñi'h xchi'dxyi Jesucristu xnehza ruhnn tu tin zi'chi ayi ru dxia'dxi nin rchi'hn tu.

**Chin dxi' Daada Jesucristu
cun xquelrnabwa' Ñi'h**

¹³Bwihtsi ra', xclaa'dzi nu gacabwa' tu ziga naa ra' xcweenta ra' bwiinnguuchi ra' tin ayi guibiin sto' tu ziga ruhnn ra' bwiinn nin ayi riachiisto' ra' ñi'h xchi'dxyi Dxiohs, ¹⁴ya ziga riachiisto' nu guhchi Jesucristu nee babahngahca Ñi'h loh guelguhchi, ya zi'chi za riachiisto' ra' nu zucwa'hn Dxiohs loh guelguhchi la'h ra' bwiinn ra' nin nuu la'n ba' nin riachiisto' ñi'h la'h Jesucristu, nee chin guibia'garii Crixtu, zucwa'hn Ñi'h la'h ra' ba, ¹⁵ni'chin pur xquelrnabwa' Jesucristu rachiñi' nu loh tu, garaa nu'h nin nagahdxi gachi ra' nu'h, chin gabia'garii Jesucristu, ayi ñiidxiuu nu'h loh ra' nin nuu la'n ba', ¹⁶laasii squii' gaca cohsa chi: zahca tuhbi ridxaa' ziga xteenn tuhbi nin canabwa', nee zihn za nu'h rsiaa'ha tuhbi aanjla nin mahzi rnabwa', nee zibwidxaa' za xtrompeta Dxiohs. Ya ziinloh Daada Jesucristu nez llaa'ndxibaa, ya chi'chi zabahan ra' bwiinnguuchi nin gwachiisto' ra' ñi'h xchi'dxyi Jesucristu, ¹⁷chi'chiiy garaa nu'h nin riachiisto' nu'h ziga dxuunabahan ra' nu'h loh guidxyiyuh, ya gadxa'galasaa'

ra' nu'h loh ra' bwiinn nin gucwa'hn Dxiohs tin zi'chi tuhsi guzeenee Ñi'h la'h nu'h la'n xcahyi tin chuunee nu'h la'h Daada Jesucristu xteenn nu'h par tu'pazi. ¹⁸Ni'chin nin rñi'n loh tu tin gulgasacwachidxyiisto' lasaa' tu cun dxyi'dxyi ra' rii'.

5 Per ziga xcweenta xi bwe'hw o xi dxyih nin gaca ra' dee', ayi xchi'hn guca'hñin loh tu, ²laasii la'hgahca tu naann dzi'tsi tu zadzihn dxyih nin dxi' Jesucristu nee gacan ziga zi chin radzihn rala'n tuhbi gubaa'n gue'la. ³Chin guiñi' ra' bwiinn nin ayi riachiisto' ra' ñi'h xchi'dxyi Dxiohs: "Ayi galuu'yi xi gaca, rga'ha dxuu nu'h dxuuzaca nu'h", chi'chi gadzihn xquelguxchisi Jesucristu hasta rii' ra' ba ziga zi chin rna'zu tuhbi dulohri la'h gunna'h chin rahldaa hohra gaalaa llii'n ba, ya ayi ru nuu gullu'n ra' ba loh xquel guxchisi Dxiohs. ⁴Per la'h tu bwiitsi ra', ayi nee dxi'h tu nabahan tu loh nacahyi; ni'chin ayi nee dxi'h tu guina'zu dxyih nin guibia'garii Jesucristu ziga zi tuhbi gubaa'n la'h tu, ⁵laasii garaa tu nuu nabahan tu loh bia'ñih xteenn Dxiohs nin naa radxyii; ayi nee dxi'h nu'h naa nu'h nin nabahan loh nacahyi, loh guelnacahyi xteenn gue'la. ⁶Ni'chin nin ayi chyu gaca bwiinn lohrbaca'ldatii' sino que nasiin gaca nu'h ayi gaca nu'h ziga naa ra' bwiinn nin ruhnn si ziga nin xclaa'dzi tihxi ra' ba sino que bwiinn nasiin tin ayi chuu xtuhlada nu'h. ⁷Pwihsi bwiinn nin rahsi gue'la rahsi si ba; ayi ruhnn cweenta ba Dxiohs. Bwiinn ra' nin rzuhdzi ziga gue'la nacahyi, nuu zuhdzi ba laasii ayi guinacweenta ba loh Dxiohs,

⁸per la'h ra' nu'h loh bia'ñih xteenn Dxiohs nabahan ra' nu'h, ni'chin nin gaca nasiin nu'h nee rga'ha guica'ha nu'h guelriachiisto' loh xchi'dxyi Dxiohs cun guelnadzii'hi lasaa' ziga tuhbi maanga dxi'ba nin rahcu tuhbi suldahdu, nee rga'ha za gaca dzi'tsi loh xigaaba nu'h laasii naannloh nu'h zila'htii' nu'h loh duhlda ya dee' naa ziga tuhbi llumbrehyi dxi'ba nin riiuu' yihca tuhbi suldahdu nin rusie'w yihca ba, ⁹laasii Dxiohs ayi gulii dxi'h Ñi'h la'h nu'h tin gueeta gabihldxyi choo nu'h, sino que gulii Ñi'h la'h nu'h tin guica'ha nu'h guel nabahan nacuubi nin runi'hi Llii'n Ñi'h, Jesucristu, ¹⁰laasii guhchi Jesucristu pur la'h nu'h tin guibahannee nu'h Ñi'h, nicala nabahan nu'h loh guidxyiyuh rii' o nicala ba guhchi nu'h dxyih nin dxi' Ñi'h. ¹¹Ni'chin nnah gulcu'gui'w lasaa' tin gapa tu ziroo' xjwersi Dxiohs ziga tuhbi tu ziga stuhbi tu, ziga zezah cayuhnn tu nnah.

**Pahblu rñi'nee la'h ra'
xpwiiinn Jesucristu**

¹²Bwiitsi ra', ranaaba duxa nu loh tu tin chuu tu cha'zi tu xchi'dxyi bwiinn ra' nin ruhnn xtsi'n Dxiohs loh tu, cun ziga ra' bwiinn nin rnabwa' la'h tu, cun nin rñi'nee za la'h tu xchi'dxyi Jesucristu. ¹³Gulgui'hnn lasahca nee gulgantsii'hi la'h ra' ba pur xtsi'n ra' ba, nee gulcwiheen za'ca lasaa' tu ziga tuhbi tu ziga stuhbi tu. ¹⁴Neezaa ranaaba nu loh tu bwiitsi ra', gulguiñi'nee la'h ra' nin care'gahn nee gulgahcane la'h ra' nin ayi rahcabwa'za'ca xchi'dxyi Dxiohs, nee gulgahpa paseensi la'h garaa ra' bwiinn. ¹⁵Gulguia'ha ayi chyuh tu guunn

duhlda ya'dxi ra' loh ra' bwiinn nin ruhnn duhlda ya'dxi ra'; mas cha'yi guunn tu ganaalla dzi'n za'ca loh lasaa' tu nee zi'chi za loh chyuchi'hzi bwiinn guidxyiyuh. ¹⁶Guldxiahxi gaduhbi loh nin nabahan tu. ¹⁷Gulcwihtxyi-gulguinaaba gacanee Dxiohs la'h tu garaa dxyih. ¹⁸Gulgadi'hi guelzuxchiilli loh garaatii', laasii dee naa nin xclaa'dzi Dxiohs gaca pur garaatii' nu'h nin riachiisto' ñi'h xchi'dxyi Jesucristu. ¹⁹Ayi cwe'hesto' tu Spíritu Saantu Dxiohs nin rñi' la'n lasto' tu, ²⁰ayi za cwe'hesto' tu xchi'dxyi ra' bwiinn ra' nin rñi' xchi'dxyi xcweenta ra' nin gue'du gaca ra', ²¹sino que gulcwiht loh garaa ra' dxyi'dxyi ya guldxia'hannee dxyi'dxyi ra' nin naa dxyi'dxyi za'ca. ²²Gulguiria'caa loh garaatii' ra' nin nadxaaba. ²³La'hgahca Dxiohs nin rbahchidxyii lasto' tu la'h Ñi'h gusiaa lasto' tu tin ba nuu nayaa Spíritu tu cun xalma tu cun tihxi tu tin ayi tsiiba duhlda yihca tu chin gadzihn dxyih nin guibia'garii Daada Jesucristu xteenn nu'h. ²⁴Dxiohs nin gulii la'h tu naa Ñi'h nin ruza'loh garaa nin rñi' Ñi'h, ni'chin nahpa zuhnn Ñi'h garaa ra' dzi'n ra' rii'.

**GuelrgahpaDxiohs cun
guelruhntaa'yi para
la'h tu bwihtsi ra'**

²⁵Bwiitsi ra', gulguinaaba loh Dxiohs gacanee Ñi'h la'h nu, ²⁶gulgadi'hi tuhbi guelrgahpaDxiohs la'h ra' bwihtsi lasaa' ra' nu'h loh Jesucristu nin nuu ri'ca. ²⁷Rna'ba'hn loh yu'bitu pur lah Daada Jesucristu xteenn nu'h gu'lda tu dxihntsi ra' rii' loh ra' bwihtsi ra' nu'h. ²⁸La'h Daada Jesucristu gacanee la'h garaatii' tu.